

八十八祖傳贊卷之五

藝十

明秀水寓公高承挺墓

雪嶠信禪師傳

附

師諱圓信字雪嶠一字雪庭浙江鄞人也朱姓早失父母稍長聞彌陀經言水鳥樹林皆

藝十

念佛法僧忽心動萬曆己亥捨俗出家截髮上天台自號不空卧古祠乞食者二年無有入處一日逢靜主妙禎因叅他心通僧勘少林僧三天竺來公案忽前後際斷說偈曰石貼背脊骨翻身脇肋骨子細思量來動也動

不得復喝曰張三殺人李四償命自此遂能作偈欲返天台尋人印證正出雲門普濟寺舉頭見古雲門二字乃大悟作偈曰一上天台雲更深腳根踏斷草鞋繩比丘五百無踪影見得他時打斷筋向人索紙筆書之自此

遂能書畫高塗大抹一洗前人印板法疏等氣而出以奇秀旋結茅武康之雙髻峯至龍池參幻有傳禪師一見把住曰佛不見身知是佛且置如何是若實有知別無佛龍池曰有了你沒了我師拓開龍池曰雪嶠不得老僧道師作禮進具戒至雲棲參蓮池宏禪師具陳行腳雲棲曰曾爲浪子偏憐客一段苦心具見然所得拈向一邊百尺竿頭更須進一步師呈偈雲棲遂句著語且曰見處高美更少作詩偈以頭陀行住雙髻峯續祖慧命師一日問百年後衣鉢付何人雲棲曰我無衣鉢無能付亦無受者師曰如此斷滅去也雲棲曰影也沒有斷滅個甚麼師曰請師授記雲棲曰諸佛授記多時也師曰不要這個葛藤雲棲大笑師拜別乞雲棲垂語令可以除

可以進雲棲曰除去有所得心進到不可到處更加精進振雙髻之風次年復參龍池龍池豎一指師曰喚作什麼龍池休去又閱歲

師著草鞋直入方丈龍池曰你草鞋猶未脫

也師曰何處見我草鞋來龍池微笑師呈偈

曰數載龍池三度豎重重問話舌生冰草鞋

分付虎狼去雙髻峯頭一箇僧龍池領之甲

寅春二月遂受記剃乙卯春雲棲示寂師爲

塔作偈有衣鉢山中問道流句是年始自

雙髻遷雙徑結千指菴於東坡池上憨山清

禪師會壅紫柏日過之機語契合題師真贊

有打破金剛圈咬碎鐵粟棘之句復爲作六

妙銘珍重而別師又於山頂築語風居榜其

門曰孤雲卧此中萬山拜其下予嘗偕居士

沈泓汪漸吳統持訪友天目山中遇師雙徑

藝一

二

見語風窓外千峯疊雲真絕境也師捫風次聞谷印公曰慈悲些師曰直要箇箇見血額愚衡公切菜次師曰作麼生曰刀刀到底師曰用許多力氣作麼曰你作麼生師曰一刀到底駕湖用公斂新月次師曰者半箇在那裏去了湖良父曰會麼師曰也只得半箇木陳恣參密雲悟公於金粟機緣未契至雙徑謁師師問曾到金粟否曰曾到師曰曾問話否曰不曾師曰你怕打那曰某甲一向不曾置得問頭請師處借轉問頭師乃開示恣即

藝二

轉金粟去師謂箬菴問曰我平日只教人誦金剛經曰多少人錯會大師意師曰直饒不錯會大遠在曰大師莫瞞人好師瞪目視之

三

師清真孫上傲然自得每振吼曼嘯不束縛沙門威儀人稱雪獅子晚遂號青獅翁世袞

法微深自保護影不出山者三十年崇禎庚辰壽昌弟子黃禮部端伯博山弟子余巡撫大成請開堂徑山興聖萬壽寺是年師正七十矣自此說法數大刹浹月即歸其久者則廬山開先而已師嘗見古雲門得悟發願欲

弘雲門宗所至拈匪真偃禪師香火未春上天童爲密雲悟公封塔說偈曰坐空千界月諸佛汝同儕鑿破青山面將身就活埋事竟謂費隱容木陳志石奇雲等曰佛法傳持子孫綿遠如帝珠網各自領會去旋至龍池帰塔有偈曰銅棺山下養龍池步入涼風覓我師當戶娑羅空腹樹迎階芳草昔人眉追思滴血曾畱偈會寫傳燈嗣法詩今日塔前成九頃源流千載繼孫兒是秋住我邑東塔寺辭香之祝始嗣龍池蓋嘗有五月盤桓也示

衆曰禪和子行脚住山須求箇本命元辰著落豈是散心雜話念柏樹子過日的直饒你念得熟如瓶瀉水卓然無依你作麼生出身參禪惟貴妙悟古人不遠千里見人三登接子九上洞山逃他一片苦心不過自然草鞋繩斷頂門眼開盡大地方知是我更無別物祖師云舉足掉臂無非西來大意不是妄語丙戌住紹興雲門寺明年秋師頻唱鶯毛雪兒滿空飛衆訝之中秋示微疾即封鐘板曰吾將去矣郭居士問囑累何人師曰此道塗汚甚今日找絕之書偈曰小兒曹小兒曹生死路上須逍遙皎月冰霜曉喫一杯茶坐脫去了八月二十六日酉刻索茶一盃師隨唱雪花飛句端然坐逝壽十七臘四十九塔全

身於雲門之前崗所著有語錄懷淨土詩行

世是爲南嶽下三十三世入室弟子徹崖歇

形山淖惟一潤曹源金石濤鎧山鳴璐先後

主叢林法席贊曰

雲棲滴雨雲門灑雪波興龍池超然獨絕  
藝十  
書畫逸品禪亦如斯一丘一壑自謂過之

三大師傳贊跋語

癸未冬月先大夫歸自寶坻將之涇縣因念  
先世禪喜作雲棲紫柏慈山三大師傳贊以  
續八十八祖繕錄於甲申下元序及雪嶠老  
人復有函蓋之契未幾而雪公化去先大夫  
更爲著語以續三大師又未幾而先大夫離  
憂感疾遂棄諸孤余小子既不忍遺忘手澤  
且言念趨庭之暇曾執侍雙徑巾瓶是我家  
祖孫父子總在諸善知識光影中重重現出  
也因流涕稽首而敘述之

順治辛丑仲春日秀水高佑紀念祖敬識於  
稽古堂

又跋

曹溪慈山大師剃度於嘉靖甲子甫十九耳  
聽無極和尚講華嚴玄談至海印森羅常住  
悟法界圓融之旨慕清涼之爲人因自命其  
字曰澄印萬曆癸酉遊五臺求清涼傳按跡  
遊之至北臺見慈山奇秀默取爲號詩以志  
之有遼莫從人去聊將此息機之句歲戊寅  
書華嚴經則刺血蘸黃金作供養血灑盡弗  
顧以此感種種瑞夢或夢入金剛窟親承清  
涼開示或夢登兜率天入樓閣覲彌勒聆轉  
識成智大義或夢覲文殊召入浴堂從不淨  
得大清淨歲辛巳慈聖太后命建祈儲道場  
於五臺達大塔院寺修舍利塔成即以金書

華嚴安置塔藏明春升座講立談聽者萬衆  
偶見清涼疏菩薩住處東海那羅延窟此云  
堅牢即今之牢山癸未夏訪至其地於山南  
觀音巖廢墟誅茅結廬以隱迨太后以禊祝  
之勞布金造寺賜額海印而師之初機已在

永明紫柏似覺範而憇公則清涼幹子圭峯  
益友也外舅譚公婦菴首肯斯言請再質之  
諸方具眼

康熙丁未冬秀水高佑鉅念祖敬識於金陵

報恩寺

隱現間晚年結菴廬山五乳峯下每念華嚴

一宗清涼乃此方撰述之祖世多懼疏鈔之  
繁廣而但宗合論奚可哉因取疏文挈提大  
旨名曰華嚴綱要至天啟壬戌而書成遂重  
入曹溪越明年示寂矣師夙參請雲谷笑巖  
二老高超義學直趨最上故能酌曹溪滴水  
化爲法雨溉被枯禪乃宗教互融恒露其初  
機而縱橫涌出其始終證入似獨契華嚴宗  
旨亦猶清涼爲六祖法孫而卒稱華嚴四祖  
云爾佑鉅讀先大夫三大師傳竊謂雲棲似

三大師傳贊序

歷代諸祖道影八十八尊紫柏可公命曲阿  
弟子賀中翰知悉屬丁高士南羽描摹大內  
稿本憨山清公傳而贊之繪乃形似傳贊乃  
神似形似殆不如神似之勝然二公苦心不  
藝十

欲於紙上見諸祖又不妨於紙上見諸祖將

作末劫津梁故令形神俱現耳前者吾友錢  
而介手書雪嶠信公製敘刊布流通其中缺  
傳贊者十一人承挺今爲參考以補之惟是  
萬曆中一時有三大和尚雲棲與淨土以統

宗教紫柏易方冊以廣大藏慈山瀆曹溪以通法脉厥功德邈焉莫傳是足繼諸祖後者國朝三百年來名宿如林猶羣山之磊砢獨此三大師則如海上三峯巍然鼎峙乃慈山赴弔雲棲紫柏時早爲二老像贊又嘗自爲

像贊是三大師道影已有繪之者特傳未具

耳憶先大夫玄期公在萬曆癸卯爲先王父

宇培公十週諷經雲棲津梁淨土時初登賢

書即起名金註先生法名廣濟字明水受二戒呈偈曰

偶從閒裡話秋闌碧樹當窓白日寒一笑不

論千古事齋頭借得小蒲團蓮池大師稱善

輒出衲衣衣之是冬計偕全陸水部謁紫柏

於請室語次有契紫柏手錄所貽慈山逐客

說爲贈慈山則壬辰癸巳間往來即墨之牢

山曾王父瀛臺公時爲膠州守頗竭禮護及

其東遊先大夫曾偕至雲棲後奉使衡州復寓曹溪請益是先大夫與三公俱有法乳之契承挺少聞梗槩故摭拾遺事各爲傳贊以附諸祖之後至壽昌經車溪冲龍池傳少室道雲門澄黃榮有天童悟磐山修博山巖

諸老雖先大夫多與盤桓今未暇及以俟續

國朝傳燈錄者爲紫柏補此慧命一大負耳

若雪嶠嘗答問語風中近復晤言東塔此又

如三峯外別爲一峯縹紲高騫孤巒特秀且

雲棲早爲印可紫柏墓其山中而慈山又特

爲著語是足繼三大師後者今杖履無恙姑

俟後緣可也賜同士出身工部尚書郎前

遷安寶坻涇縣令蒙溫旨敘功紀錄旌異構

李寓公高承挺澤外父纂時崇禎闕逢澗灘

之歲良月穀旦

附三大師傳贊

明秀水寓公高承挺述

蓮池宏禪師傳

姓沈氏年十七補諸生早棲心淨土嘗書生  
免事大四字於几案及閱六祖壇經喟然曰  
茫茫生死安可無本據耶父母沒決志離俗  
嘉靖乙丑除夕命繼室湯點茶至案蓋裂師  
藝十  
顧曰姻緣無不散之理丙寅元旦與湯訣有  
一筆勾詞時年三十有二從性天理公祝髮  
無盡行公授具足戒尋禮五臺感文殊放光  
過伏牛山隨衆煉魔至北京龍華寺參徧融  
貞公融曰無貪利無求名無攀緣貴要之門  
惟一心辨道老實持戒念佛遂受六度萬行  
之囑參笑巖寶公於柳巷巖曰汝何處人師  
曰浙江人巖曰却爲何事師曰特到這裏來  
求和尚開示巖曰阿你在三千里外遠遠來

藝十

九

開示我教我將甚麼來開示你師恍然即禮  
辭歸過東昌府聞蕉樓鼓聲忽大悟作偈曰  
二十年前事可疑三千里外遇何奇焚香擲  
戟渾如夢魔佛空爭是與非分衛至南京瓦  
棺寺病革即有欲以就荼毗者師微曰一息  
尚存乃止病間至湖州之南潯住豆腐橋廢  
祠中苦行三年無一知者五與越中禪期終  
不識鄰單姓字隆慶辛未乞食杭州之梵村  
見山水幽寂遂有終焉之志山故宋伏虎志  
逢禪師利也圮於巨浸環山多虎歲傷人不  
下數十師結茅三楹居焉諷經施食虎患頓  
息歲旱衆強師出禱師循田念佛甘雨隨注  
衆異之相與助建禪林安居學者即今雲棲  
道場也萬曆丙子再禮五臺已卯庚辰間復  
參笑巖寶公於京西觀音菴無何以疾南還

梵村有朱橋屢爲潮汐衝塌行者病涉師倡復無論貴賤請人施八分而止或疑其少師曰心力多則功自不朽不日集千金鳩工築基每下一椿持咒百遍潮汐不至者數日橋竟成戊子歲大饑疫日斃千人余知府良樞請師就靈芝寺禳之疫遂止壬辰歲杭之淨慈寺請講圓覺經聽者日數萬指因贖門外萬工池并城中上方寺長壽菴二池爲放生所既又助濬西湖三潭所著戒殺文海內多奉行之慈聖皇太后見師放生文遣內侍頒賜蟒龍袈裟設供問法要師啟以偈答而什襲紫衣不敢服慈聖繪像宮中禮焉師道價日增四衆翕聚而清規益肅凜若冰霜達觀可公贊師有末法戒壇成酒社東南撐柱仰高風之句憨山清公則稱其一味慈悲十分

清淨幻有傳公與師同參笑巖其刻語錄也致書雲棲推師爲當世金剛正眼乞作唱導語一時賢士大夫問道者指不勝屈王侍郎宗沐問夜來牀頭老鼠唧唧說盡一部華嚴經師云貓兒突出時如何王無語師代云走却法師留下講案因頌曰老鼠唧唧華嚴歷歷奇哉王侍郎却被畜生惑貓兒突出畫堂前牀頭說法無消息無消息大方廣佛華嚴經世主妙嚴品第一朱居士驚問參禪念佛可用融通否師曰若然是兩物用得融通著藝十左太常宗郢問念佛得悟否師曰返聞聞自性性成無上道又何疑返念念自性耶虞光祿淳熙問慧日入西院公案師答曰慧日自甘窮子捨已從人西院屈陷平民將生就死可惜五百僧只解點著便行曾無一二高卧

不起令慧日顯異感衆禍及兒孫周侍郎汝  
登問鳥窠吹布毛機緣師答曰諸惡莫作衆  
善奉行當下布毛滿地何待拈吹先大夫金註先生屬時晦  
斗光後更名道素錢應性豪邁一見師輒折節請  
益師有開示語先大夫呈偈師稱善囑曰學

華子

十一

道人當息却口頭三昧而求實悟又曰楞嚴  
經最有次第宜先看先大夫嘗語承延曰新  
建而前吾師潛溪楚石而後吾師蓮池兩浙  
靈秀盡萃於斯一代儒釋孰能過之師從念  
佛得力立說主東林淨土南山戒律乃著彌  
陀疏鈔戒疏發隱二書又編禪關策進益顯  
禪淨雙修不出一心師之化權微矣嘗垂語  
曰本朝第一流宗師無過於楚石和尚有西  
齋淨土詩一卷彼自號禪人而淺視淨土者  
非也乙卯夏六月晦日師預設供別衆七月

己酉示微疾日當午命扶西向坐哆唎念佛  
端然而逝世壽八十一僧臘五十塔全身於  
五雲山之麓釋經輯古手著凡三十餘種總  
名雲棲法彙行世從上諸祖單提正令未必  
盡修萬行若夫即萬行以彰一心即塵勞而  
見佛性昔惟永明今惟雲棲而已師素誠衆  
貴真修勿顯異故諸靈異不具載上首弟子  
鵝湖廣心瓶匱廣印拂水廣潤暨廣寂廣承  
廣伸廣德大賢大真大倫大獻以下若而人  
參學如壽昌慧經雲門圓澄雙徑圓信博山  
大藏淨名大蓮三峯法藏等竝飲水知源者  
也贊曰

維大雄氏分禪教律雲棲總持一門超出  
單提六字旋乾轉坤慈雲膚寸大地渾淪  
達觀可禪師傳

藝十

十一

藏

師諱真可字達觀晚號紫柏學人稱爲紫柏尊者吳江沈氏子生五歲不語有異僧過門摩其頂遂能言志氣雄放不可羈勒嘉靖己未年十七仗劍欲遊塞上至蘇州天雨宿虎丘僧舍聞僧夜誦八十八佛名遂解腰纏請明晨設齋剃度自是即脇不至席矣年二十從講師受具戒掩關於嘉善之景德寺三年遂行脚參知識究明大事聞僧誦張拙秀才偈云斷除妄想重增病趣向真如亦是邪大疑之一日齋次忽悟乃曰使吾在臨濟德山座下一掌便醒安用如何若何自是凌鑠諸方隆慶壬申師同陸文定樹聲參雲谷會公扣擊華嚴宗旨谷發揮四法界圓融之妙師歎爲未曾有過匡山窮相宗奧義遊五臺空巖中老宿孤坐師問一念未生時如何宿豎

一指又問既生後如何宿展兩手師言下有契萬曆癸酉至京師參還法師於張家灣參理法師於千佛寺參笑巖寶公於西方菴末後乃至法通寺參徧融貞公融問來此作麼曰習講問習講作麼曰貫通經旨代佛揚化融曰你當清淨說法師曰即今不惹一塵融命褫師直裰施旁僧曰脫了一層還一層師心折之遂畱掛搭觀其動履冥啟多矣未幾南還適聊城傳御史光宅爲吳縣令其子利根甚黠慧揭二花問曰是一是二師曰是一根遽開手曰此花是二師何言一師曰我言其本汝言其末根遂作禮旋至嘉興見楞嚴寺父廢乃屬陸莊簡光祖馮祭酒夢禎包副使檉芳爲外護而委弟子密藏開公鶴林葉公興復之陸副使光祚助建禪堂先成師乃

引錐刺臂血盈盃書誓語曰若不究心坐禪  
徒增業苦如能護念罵佛猶益真修又念兩  
都大藏印造艱難且卷帙繁重更難於持行  
流通遐方僻壤有終不得聞佛法者改刻梵  
筭爲方冊印行輕便普使見聞作金剛種子  
遂創刻於五臺山移於寂照菴至今徑山貯  
板楞嚴發經俾大藏傳播薄海内外皆師願  
力也丙戌訪慈山清公於東海牢山海印寺  
心相印契遂許生平再入京師復潭柘寺戒  
壇時徧融身公已入滅師爲文哭之有嗣德  
不嗣法語乃繇三晉歷關中跨棧道西遊峨  
嵋禮普賢大士順流下瞿塘過荆襄登太和  
憩匡廬重興歸宗古寺過安慶遊皖公山建  
佛光寺北至房山石經洞復晉靜琬法師塔  
院感琬公所藏佛舍利放光慈聖皇太后迎

舍利入大內供三日重藏石窟神宗顯皇帝  
手書金剛經汗下瀆紙疑當更易遣內侍質  
師師進偈曰御汗一滴萬世津梁無窮法藏  
從此放光神宗大悅慈聖皇太后聞師至命  
近侍致齋供賜紫伽黎師遜謝避暑上方山

造慈山清公入都晤師於兜率院師復偕至  
雲居禮石經遂同住西郊園中對談四十晝  
夜目不交瞬時萬曆壬辰秋七月也師既與  
慈山約往濬曹溪以通法脉癸巳歲先至匡  
山待之越二年乙未聞慈山以弘法惟難歎  
曰法門無人矣即往探曹溪禮法供戒靈通  
侍者飲酒弔故禮越陳亞僊有詩偈法語將  
行赴京師救慈山達知其謫戍雷陽遂待於  
江濱仲冬相見於下關旅泊菴執慈山手曰  
公不生還吾不有生日慈山再三慰解之瀕

別師囑曰吾他日即先公死後事屬公歲庚子南康知府吳寶秀浙江樂清人也有善政以礦稅被逮其夫人哀憤投繯庵師在匡山聞之曰閩人橫行至此世道不可爲矣乃決策入京師謂人曰憨山不歸我爲法一大負慧十

十四

礦稅不止我救世一大負傳燈錄未續我慧命一大負捨此一具骨釋此三負不復走王舍城矣越二年壬寅師於赭山會延慶寺忽自題其像曰這箇阿師心直口快走遍天下園中自在癸卯九月爲預祝蓮池宏公明年

七十偶冬十月妖書事起震動中外忌者乘之劾師下司寇獄及鞫訊師但以三大負對絕無他辭時曹御史學程在請室傾心問道有園中語錄先大夫錢應金註先生爾時  
諱斗光後更名道素計偕至特進謁請室見其深慈定力殷勤接引

謂有神光斷臂之風邊有欲死師者師曰世法如此久住何爲臘月戊戌索浴罷端坐說偈微笑而逝世壽六十一僧臘四十五越十三年丙辰冬憨山清公至徑山爲師舉龕荼毗肉身儼然舍利無算塔於徑山之文殊臺有紫柏集行世師氣雄體豐面嚴冷心乃最慈戒律精嚴見地直截穩密足可遠追臨濟近接楚石從毗舍浮佛半偈悟徹親切示人居恒義重君親入佛殿見萬歲碑必致敬閱大統曆加額後覽偶讀長沙志見忠臣李芾殉城事淚直迸灑視侍者自若師訶曰當推墮汝於崖下其天性若此所至護持正法摧伏魔外入室弟子甚多而宰官居士尤衆先後興復十五古刹所刻大藏外訪求古尊宿語錄及經論註疏梓行者凡若干種贊曰

巍巍紫柏法門荆棘抉面屠腸斬頭灑血

創方冊藏顯直指禪閃電不絕孤雲自還

### 憨山清禪師傳

師諱德清字澄印別號憨山全椒蔡氏子七歲見叔母生子又見叔先郎抱生兒去來之疑年十二禮南京大報恩寺西林寧公爲師趙文肅貞吉見之曰此子當爲人天師也嘉興雲谷會公得法於法舟濟禪師與冬谿澤公齊名嘉靖甲子往來棲霞報恩每示學人曰古人終日喫飯不嚼粒米終日行路不踏寸地如是用心方有少分相應師執侍甚勤谷開示出世參禪悟明心地之妙師即請西林披剃盡焚所習外學偕雪浪恩公並事無極湛公受具戒聽講華嚴玄談有省因以澄印爲字歲乙丑雲谷集五十三人結坐禪期

於大天界寺力拔師入衆同參谷指示向上一路教以念佛審實話頭從此參究一念不移隆慶己巳住靜金山二載辛未始辭谷北遊谷曰古人行脚單爲求明已躬下事爾當思將何以見父母師友慎勿虛費草鞋錢也

壬申至京師投宿河漕遺教寺往西山從摩訶菴忠法師聽妙宗鈔又聽法華唯識詣安法師爲說因明三支比量參偏融貞公求指示融無語惟張目直視參笑巖寶公巖問何方來曰南方來巖曰記得來時路否曰一過便休巖曰子却來處分明師便作禮萬曆癸酉遊盤山至千像峯石室見不語僧遂與度夏明年偕妙峯登公請大藏歸山陰王府入少林禮初祖結冬邸中閱物不遷論至梵志出家頃了旋嵐偃藏之旨於是生死去來之

疑水釋作偈曰死生晝夜水流花謝今日乃知真孔向下伏牛山法光禪師贈以偈且曰要公不捉死蛇耳乙亥至北五臺禮文殊大士大方廣公厚禮之尋結茅五臺峯下之龍門匡山黃龍潭釋微空至同居半載參鳳林

華子

十七

寺二虎亂公虎甚器重丙子蓮池宏公復遊五臺與師語契爲畱旬日丁丑見南嶽發願文刺血書華嚴經辛巳仲冬慈聖皇太后爲神廟建祈儲道場於五臺山大塔院寺期百有二十日師與妙峯主其事壬午八月光廟誕生師與妙菴禎公結隱太行山障石巖至京西中峯寺重刻中峰廣錄結冬水齋於石室癸未春即遁居東海之牢山豁悟楞嚴觀境因恢復那羅延窟道場始易號慈山慈聖再徵不得甲申乃得其所在輒賜內帑師倣

古矯詔賑饑事以賑山東饑民丙戌慈聖頒藏經於東海布金造寺賜額海邱達觀可公訪之盤桓二旬丁亥殿宇工竣始開堂爲衆說戒己丑請藏至南京報恩寺感寶塔放光爲二親營生墳壬辰七月訪達觀可公於京師對談四十晝夜偕過石經山禮釋迦文佛舍利禮石經於雷音寺禮琬公塔院癸巳山東又饑師以山中所儲齋供盡分贍邊山四社之民甲午冬說戒於京師大慈壽寺歲乙未方士流言侵擾逮赴詔獄按驗無實坐以私創寺院戊雷州衛達觀可公欲白其枉師止之爲作逐客說贈師而別道出江西鄒忠介元標迎至鐵佛菴與師一言投機頻翻前案丙申春入曹溪禮六祖乃抵成所寓城西古寺坡公亭雷州饑癟師掩骼埋胷以萬計

藝十

大

乃建盂蘭會說幽冥戒天大雨癘隨止未幾  
建化城菴於電白縣西苦藤嶺施茶濟衆戊  
戌修曹溪通志成構禪室於壁壘間倣大慧  
冠巾說法歲庚子始住錫曹溪爲靈通侍者  
授戒歸侵田斥就舍屠門酒肆蔚爲寶坊綏  
白金集攝折互用大鑑之道勃焉中興乙巳  
渡瓊海訪蘇東坡桄榔菴白龍泉求覺範禪  
師遺跡不可得爲之慨然修五羊青門長春  
菴作曹溪解院爲六祖辨供冬十一月熹廟  
誕生恩詔開伍癸丑度嶺至湖東修衡州量  
華精舍遊德山禮祖甲寅夏慈聖皇太后寢  
天詔至師返僧服乙卯禮南嶽直登祝融峯  
旋遊九嶷山過冬於愚溪丙辰爲花藥寺僧  
續法系過梅雪堂弔遜菴至武昌禮大佛遊  
九峯禮無念有公塔至潯陽遊東林有懷古

詩登匡廬弔徹空避暑金竹坪遊歸宗寺登  
金輪峯禮舍利塔至黃梅禮四祖五祖塔遊  
浮江截江登九華禮地藏遂東遊浙江會葬  
達觀可公於徑山弔蓮池宏公於雲棲各爲  
塔上之銘先大夫錢應金註高先生譯道素自雲棲歸謂

承挺曰小子識之慈公師友死生之誼便非  
流輩所及豈俟弘法利生始見宗門龍象耶  
王邑宰在公語師曰昨覽楞嚴經八遍覺與  
昔時眼界不同師曰不要熱忙只管看來看  
去和經都不見了始得赴淨慈寺宗鏡堂說

藝十

十九

大戒名宿雲集遊靈隱三竺西山贊揚放生  
三池過嘉興棲真寺埽雲谷會公塔爲傳以  
表之赴蘇楞嚴東塔金明三利瞻禮者數千  
人至吳門遊諸名勝諸大老問道於觀音山  
復迎至虞山拂水爲三山綏白說戒於京口

大徹堂丁巳返廬山建法雲寺於五乳峯下  
效遠公六時刻漏專修淨業天啟壬戌復住  
曹溪癸亥十月十一日示微疾沐浴焚香集  
眾告別顧曰今日截斷葛藤端坐而逝世壽  
七十八僧臘六十自夢遊集外有經論註解  
二十餘種行世師氣宇軒舉士大夫有志節  
者多與之遊張文端位曰人知慈師爲大善  
知識耳不知有社稷功也達觀可公曰曹溪  
肉祖所現通來曹源涸矣藉慈師以謫戌爲  
波瀾而曹源復活爲題康僧會尊者像寄之  
有康祖來吳慈公謫粵語其推崇如此今上  
皇帝御贊師像云這老和尚何等行狀撐持  
法門已作棟梁受天子之鉗錘爲佛祖之標  
榜後署御名供大內九蓮菩薩院中先是乙  
丑歲龕歸廬山五乳峰法雲寺塔而藏焉崇

禎癸未粵人復奉其龕歸曹溪歷年二十端  
坐如生遂金漆塗體升座與六祖肉身相望  
就天峙岡舊塔院地供養名曰慈山院去南  
華寺半里許師每謂萬曆間五大師際會一  
時雖體用不同理事各別其所以扶樹宗教  
未嘗不同途合轍爰作三銘二傳以備僧史  
三銘者蓮池宏公達觀可公暨壽昌無明經  
公二傳則妙峯雪浪也其上首弟子知微善  
若惺炯修六逸智海岸悟心融顥愚衡夜臺  
某雪嶺峻等數十人不具載師嘗示雪嶺峻  
曰學道人第一要骨氣剛次要識量大次要  
生免心切嗚呼師生平亦盡此三言矣贊曰  
西林抽條柳巷脫木終返曹溪如雲赴谷  
機緣擇應文句鐘鳴全身說法不假三生

古文

**柯** 朗可切音 桿亦切音 席潮沙 **汐** 樊亦切音 席潮沙 **麓** 蘆谷  
**裸** 磬柯也 **也** 早日湘夕 日沙 **麓** 切音  
**操** 山足 **古** 柏切音 格骨枯 **資** 四切音  
**曰** 莺 **日** 路 又寰骨 **日** 路 **齒** 潤內齧 **日**

藝  
十

二